

## Riccarda

(Eco dil tschep da lenna)

Presapauc in meins avon che «Riccarda - eco dalla Bassa» compari en la Gasetta Romontscha Nr. 88 dils 3 da november 1967, ha il scribent de questas lingias retschiert cun legherment e marveglias il medem di 2 exemplars cun historias romontschas. In, in cudisch ualti pulpiu ded edziun Fontanivas, cuntentent la suletta historia «Caum sura». L'auter in cudischet «Riccarda» cun buca meins che 11 historiettas. Igl emprem hai legiu Caum sura cun la speronza ded era anflar en quella la medema recreaziun sco en las autras ovras scaffidas dil medem scribent. Ed jeu sun buca setrumpaus. Quella ha senz'auter perfin cuntentau in tschep da lenna che dumbra 70 annadas.

Mo era Riccarda ha leventau mias marveglias. Buca ch'il maletg sin la cuviarta havess cudizau in um vegl, — mo 11 historias en in aschi pign cudischet ei curdau si a mi. Jeu hai legiu,— e certas turnau a leger ed era empruau de leger denter las lingias. Hai era fatg mes pertratgs e vegnius sin l'idea, quei fuss pulit per geniturs, fuss in bien muossavia. Mo per giuventetgna ded oz, cun regl de laguoter tut en ina e pauc temps per far ordlunder insa historiuna, ei il desiderau success forsa strusch avon maun. Denton vulein bugen schar la raschen a Sur Giosch. Possi el haver desiderau success sco optimist, e cun agid de Diu, in fritgeivel operar per sia cara giuventetgna.

Uss aunc enzatgei, - e quei tut senza malart.

Pertgei gest tschep da lenna?

Sur Giosch scriva sez: Secund tgi che legia la Riccarda, legia ella auter. Ed el vegn tschaffaus, priu ch'el seigi buc in tschep da lenn.

Cura che hai legiu igl eco dalla Bassa e vegnius tier il plaid tschep da lenna, hai jeu cun in surrir — mo buca malign — tertgau: — quei ei ussa ual in dretg plaid per tei. La generaziun pli veglia auda oz en general tier ils tscheps da lenna, - e sur da cauras e nuorsas scriv'ins era buca historias pli. Cun sbargats imens fan ins ussa progress e tats e tattas san star ruasseivlamein sin baun pegna e leger historias. Nua ch'ins scaulda aunc pegna cun lenna, sa il tat mintgaton star in'ura sper il tschep.

Ussa aunc in per plaids sur quella gronda, per ordinai maltschecca, maldulada buor'atscha. Quella darivava tier nus per pli part ord in mutagl. Quei ei il pli giufuns della plonta. Preferida vegneva ina plonta carschida si en grevas relaziuns, nua che quella fuva sco plontina vegnida disturbada en sia carschientscha ed aschia entras maluliva proporziun e retenientschas dau ordlunder cun il diember ded onns in veritabel mischel. Quei deva allura ordlunder in famos tschep che teneva ora decennis supponiu ch'el vegneva adina mess a suost. Il tschep lenna ha pia adina giu gronda ronda impurtonza. Era jeu en pli giuvs onns, sco fumegl de renomai purs, che havevan pli che ina pluna lenna secca sper casa, havevel caschun mintga mument liber de far enconuschientscha cun el. Era udev'ins enqual gadas tier in cletg nunspetgau: Tier quel fa aunc il tschep da lenna vadi. Denton tier mei ha el mai fatg. Ussa vi concluder e sch'entgins lecturs fan in tec bucca de rir, sche sundel cuntents. Era il carstgaun cun in cor normal en siu tgierp, sa crescher si en ses giuvs onns en empau semegliontas relaziuns, e lu sa ei maneivel dar ordlunder in tschep da lenna sco jeu.

Gioder de Razén

GR 17-11-1967